

M081B: Seckauer (St. Lambrecht) Gebete B

0,3 sô dû daz opfer genemest sô sprich
 0,4 ich bite dich hêrre durch die wîhe unde di lîphaftige
 0,5 und di êrwirdigen tougene . und durch di michelen
 0,6 kraft dînes heiligen lîchnamen . und dînes hêren bluotes .
 0,7 daz uns tagelîchen vuoret . unde trenket . daz uns liutert
 0,8 und reinet . und uns heilic machet . und uns teilnûmftic
 0,9 machet . der êwigen goteheit . gip mir hêre dîne heilige
 0,10 tugende . ervûlle mîn herze mit den wâren tugenden daz
 0,11 ich mit lîhtem sinne unde mit lûterem herzen gên müeze
 0,12 ze dînem [tische] . und [ze] [dînem] vrônem altære . daz ich
 0,13 dich himelischez heilictuom alsô entvâhen müeze daz ez
 0,14 mir werde ein wârez heil . und der êwige lîp . wande
 0,15 dû uns hêrre alsô geheizen hâst .
 0,16 “daz brôt daz ich gibe daz ist mîn vleisch und mîn
 0,17 bluot durch dirre werelt leben der mich izzet der lebet mîn
 0,18 er ist in mir . und bin ich in im .”
 0,19 aller brôte suezest heile den guomen mînes herzen .
 0,20 daz ich inne werde . und verstê der süeze dîner minne .
 0,21 heile hêrre mîn . herze von aller slahte sêre . daz
 0,22 mir niht smerze oder süeze si . wante dû eine aller brôte
 0,23 wîzest . dû hâst die êwigen süeze . und den heiligen
 0,24 smac . dû uns ze allen zîten æzest . und dîn doch niemer
 0,25 zerinnet mîn herze müeze dich ezzen mit der süeze dînes
 0,26 smackes . werde mîn herze unde mîn sêle ervûllet und
 0,27 gesatet .
 0,28 dich izzet der engel mit vollem munde . der ellende
 0,29 mennische izzet dich . al nâch sîner krefte . daz im niht
 0,30 gebreste an dem wege . dirre vuore sol er leben .
 0,31 heiligez brôt lebentez brôt dû uns koeme von himel
 0,32 und gîst der werlt den êwigen lîp kum [in] mîn herze
 0,33 unde gereine mîn herze . [unde] mich . von aller slahte . übel .
 0,34 des vleisches und des geistes . kum in mîne sêle . und mache sî
 0,35 heilic . heile sî ûzen und innen . wis mîn huote und mîn
 0,36 beschirmunge wis ein êwigez heil . meines lîbes unde
 0,37 mîner sêle . vertrîp hêre von mir die vînde . die mir
 0,38 lâgente sîn vertrîp si hêrre von der gagenwarte mîner
 0,39 riuwe daz ich ûzen und innen . alsô bewart sî daz ich
 0,40 an den rehtem wege . den dû uns vor giege volkome

0,41 hin ze dînem rîche . dâ man dise heilicheit niht begêt
0,42 alsam hier . mit tougenlîchen dîngen sunder dâ wir gesehen
0,43 schulen mit unseren ougen . dîn antlûtze dâ wir
0,44 dich schouwen wertlîchen alsô dû bist sô dû hêrre vater
0,45 unde got in dînem rîche gesitzest . sô dû ez hêrre allez wirst
0,46 in uns allen unde dû erschînest in uns . unde dû uns alle
0,47 verwandelst an dich . sô gesatest dû mich dîn . mit einer
0,48 wunderlîchen sîeze . sô bin ich sat von êwen ze êwen .
0,49 sô en dûrstet noch hungert mich niemer mêre . âmen .
0,50 lamp des almehtigen . vaters dû dâ koeme von
0,51 himele . unde benæme der werlt ire sünde benim . hêrre von
0,52 mir mîn unreht unde mache mich des wert daz ich
0,53 gezalt werde under dînen megeden unde hilfe mir daz
0,54 ich hiute dînen heiligen lîchnamen entwâhen müeze niht
0,55 ze einer verlorenusse unde ze einer verteilunge . sunder hilf mir
0,56 durch willen mîner vrouwen sancte Marîen . und aller dîner
0,57 heiligen . daz ich in entwâhen ze antlâze mîner sünde .
0,58 mîn vrouwe sante Marîe mit allem himelischen here .
0,59 sî mir wegente daz mir vile armer unde bewollener
0,60 mit michelen sünden . dirre hêre lîchenam unde ditze vrône bluot .
0,61 werde ein erzentuom . und ein antlâz aller mînen sünden .
0,62 lebentigez brôt der engele . lieht und leben der
0,63 werlt . hêrre Krist erliuhte die vinster mînes herzen
0,64 daz dirre hêre lîchnamen und dîn heiligez bluot sî mir
0,65 ein heil . und ein lieht mînes lîbes und mîner sêle .
0,66 hêrre heilant . Krist heilære aller diete . erloesære
0,67 dirre werlt . dû bist ein barmherze genâdære . und minnære
0,68 alles mankûnnes . dû hâst genuoc dicke vertragen . mîne
0,69 schulde unze her nû lobe ich dich hêrre und ger einvalticlîchen
0,70 dîner genâden . daz dû mir ruochest ze helfen
0,71 durch willen aller dîner heiligen . daz ich mit dirre engelischen
0,72 vuore und mit disem himelischem brôte daz ich
0,73 hiute gerne entwâhe daz ich dâ mit erwerben müeze den
0,74 êwigen lîp âmen .
0,75 hêrre got erbarme dich über mich . durch die hêren
0,76 geburt dînes sunes unseres hêrren Jesu Christi . daz er geboren
0,77 wart in dise werlt . von sante Marîen . allem mankûnne
0,78 ze trôste durch die selben genâde . vertilge hêrre
0,79 allez mîn unreht . unde brînc mich ze den êwigen
0,80 wûnnen . dare er uns geladet hât . mit sîner marter und
0,81 mit sînem tôde .
0,82 ich bite dich hêrre durch die vrônen tougene dînes
0,83 hêren lîchnamenes . und dînes bluotes daz dû mînen lîp
0,84 unde mîn herze niuwest unde reinest gip mir daz ich
0,85 mit disem hêren lîchnamen in dir belîben müeze . unde
0,86 dû in mir verlîch mir hêrre . daz ich an mîner hineverte .
0,87 von disem enellende . dînen hêren lîchnamen und dîn
0,88 heiligez bluot . werdincliclîchen entwâhen müeze . daz si mir

0,89 sîn ein licht und daz liehtvaz der wec . unde der wegewist
0,90 der liuhtære unde süeze geverte der wirt unde der
0,91 herbergære .
0,92 heiligez opfer hêrre got dû hâst diu wort diu
0,93 des êwigen lîbes wir wîzen und erkennen daz dû bist der
0,94 heilige Krist der wære gotessun .
0,95 sô dû daz opfer genemest sô sprich .
0,96 nû sihe ich hêrre des ich ie gerte . des mîn herze
0,97 ie gerte . daz hân ich dîn heiligez vleisch . und dîn
0,98 bluot . hân ich entvngen . willekomen aller v[l]eische hêrest
0,99 aller ezzen süezest . willekomen himelischez tranc .
0,100 süeze des êwigen lîbes . dîn vleisch hât entvngen mîn sêle .
0,101 nû verwandel mich hêrre nâch dir heiliger Krist wande
0,102 dû daz rehte leben bist dînen lîchnamen muoz ich behalten
0,103 reiniclichen daz gip dû mir êwiclichen . er
0,104 geruoche wonen hier ze mir . daz er gehuldige . und geheilige
0,105 mich dir âmen .
0,106 ich hân gâz dînen lîchnamen ich hân getrunken
0,107 dîn bluot ich bin mit dem lîchnamen enbizzen der an
0,108 den kriuze erhangen was ich hân getrunken daz bluot .
0,109 daz [ûz] Kristes sîten vlôz .
0,110 ich sage dir lop und genâde hêrre . daz dû mich
0,111 sunderingen geheilet hâst und . gereinet hâst unde mit
0,112 dîn selbes verhe unde bite dich hêrre . daz mich disiu heiligiu
0,113 wirtschaft erloese von des lîbes angesten . unde von dem
0,114 êwigen tôde . unde brinc mich zuo den die dâ stên schulen
0,115 ze dîner zesewen an den jungestem urteile dâ wir alle
0,116 gestên schulen vore dir übel unde guote . dâ wirdet den
0,117 übelen erteilet . swebel unde viur . dâ gîst dû hêrre den
0,118 sæligen dich selben ze lône . dû wirdest selbe ire leben
0,119 zuo dir wirdet verwandelt ire herze unde ire sin dâ samenent sich
0,120 die sêle unde daz vleisch . daz tuot des êwigen gotes geist
0,121 der machet sî lûter unde reine . si ne wizzent noch en
0,122 minnent niht wan dich einen mit dir ist ervüllet diu sêle
0,123 unde der lîchnam . sô wirdet daz vleisch dem geiste gehôrsam .
0,124 hêrre got sô gedenke mîn durch êre dînes vleisches . unde
0,125 dînes bluotes . dem [ich] hiute gemeinet hân . sô verwandel
0,126 mich hêrre in daz êwige leben . daz dû iermêre in mir
0,127 belîbest und ich in dir dû bist selbe der êwige lîp mit
0,128 dînem heiligem geiste verwandele mich vile armez wîp .
0,129 daz ich vroelichen müeze gên in die himelische Jerusâlêm
0,130 unde mit den erwelten iemer leben . in den genâden dâ ich
0,131 dich êwiclichen sehe . âmen .